



## « صوت... و صدى »



لعشاق الجمال الحقيقي في الشعر نضع بين يديكم «صوت و صدى»  
خاص جدا للشاعر محمد المناعي والشاعرة طيف النعيمي الذين بعثوا  
لنا هذا الإبداع الخاص ليكون بين يدي قراء «أوزان»

بعض البشر في صدرهم عاش قلبين  
والبعض الآخر قلب عذب مذاقه  
وين الذي يوفي مع الزين بالزين  
بعض البشر تشفق عليهم شفاقه!  
هذا بقلبه يسكن اليوم شخصين  
وهذا كسير القلب والههم عاقه  
مير البلا من يكسر القلب نصين  
أول يحبك ثم يطلق وثاقه  
أول ينادي يابعد قلبي والعين  
واليا لقي غيرك يروغ أبرواقه  
مايستحق نثر على الخد دمعين  
بكره تشوفه مندلع باحتراقه  
خله على كيفه مصيره مع الشين  
اللي عشانه باعنا في حماقه  
يندم على فعله ويصفق بكفين  
وتسيل دمعاته.. ويخسر سباقه!  
هذا مصير اللي كسر قلبك الزين  
خله مثل ماقال: خلنا صداقه

للشاعرة: طيف النعيمي



تدري وش اللي يقسم القلب نصفين؟  
لما الحبيب يقول خلنا صداقه!  
اتهون به عشره من «اسنين وابنين»  
والقلب، كيف القلب يعلن طلاقه؟!  
ويبيع من بسداه بين الملايين  
وببرود قال إنها مجرد .. «علاقه»!  
روح .. وتوكل .. واترك «الجيم والسين»  
عفت الغلا ما دامه الضجر فاقه!  
القلب: بيت وكان يحوي به اثنين  
والحين نصفه سار رحلة فراقه  
والعين: صارت عقب فرقاها بحرين!  
ميت وأسود مثل جيره ورفاقه!!  
والليل: جلاذ يعذب بمسكين  
بالشوق يجلدني وما فيني طاقه!!  
من يومها وأنا عويقي إلى الحين  
والطب ما فسّر سبب هاالإعاقه!!  
اسأل مجرب اشبلى قلب نصفين؟  
بيقول : حبّ ذيلته الصداقه

شعر: محمد المناعي